



En regudientscha da
Ervin Deragisch-Riedi,
18.11.1938 – 09.09.2013

Erel aunc en vacanzas cura ch'jeu hai intervegniu digl accident da miu frar vegl. En la staziun intensiva a Cuera hiel visitau el pliras gadas.

Quei um - avon onns plein forza ed energia - era d'in di sin l'auter dependents dil personal che han fatg bien cun el ed el era dependents dalla tecnica medicinala.

All'entschatta capeva el mo vess, mo el raquintava da schabets che pertuccavan collegas da sia vegliadetgna, ils quals eran gia morts. Tuttenina di el: «Hiel prest 75 onns. Quei ei ina biala vegliadetgna».

Ervin era il frar vegl dad endisch fargliuns, ed jeu il secund. Nus dus havevan bien contact in cun l'auter, schegie che nus eran dituttafatg differents tips. El, plitost in da paucs plaids, saveva denton se revegrin cu ei mava encounter mesanotg e saveva divertir nus cun in humor che nus fargliuns havein mai emblida.

Vegnius ord scola ha el entschiet a luvrari el luvratori dil bab Valentin. Suenter entginas jamnas di il bab ad el: «*Ti, jeu hiel annunziau tei sco emprendist da scrinari tier mei!*»

Sco jeu sai, eis el seremess, ha terminau quella scolaziun e suenter luvrau ensemens cul bab, entochen ch'el ei sedecidius da maridar. Quels sis onns suenter gl'emprendissadi ha el luvrau senza pagaglia e mo retschiert in daner da sac. Pil bab cun ina gronda famiglia ei quei naturalmein stau in immens grond agid. Pér suenter eis el vegnius remuneraus en daner blut per siu engaschi.

Ervin ha maridau Leontina Riedi, oriunda da Tschamut, secasada già d'affon culs ses a S.Vittore ella Mesolcina.

Gl'empremnaschiu ei morts da baret. Silsuenter ein Silvio, Ursula e Doris entrai el ravugl dalla famiglia.

Il Mihel, ch'igl Ervin ha acceptau sco in agen,
el e gl'Ervin han viviu en scrinaria maun en maun, en grond respect
vicendeivel.

Ad omisdus gauda grond engraziament.

Ervin ha surpriu il luvratori dil bab e luvrau en quel onns ora ensemes
cun conluvrers ed era scolau in tschappel emprendists. Pli tard ha el lu
surdau la scrinaria al Mihel e quei ei gia la quarta generazion da scri-
naris en famiglia.

Jeu seregordel cun plascher dallas visetas che miu frar ha fatg en casa
pervenda a Tumegl. El vegneva, purtava ligiongias seccas da Tujetsch e
nus gudevan cun plascher siu far e damanar. Quellas impressiuns restan
era a mi en buna regurdientscha.

Ervin, Tiu viadi terrester ei ius a fin.

Sco davos segn da Tes fargliuns havein schau scriver sil pindel dil matg
cun ornaments digl atun, cun ina ragisch e lenn stgein ils plaids:
«*En engrazieivladad - Tes fargliuns*»

Tiu frar Silvio, caputschin

Posterioramein ha in preziau vischin da Tujetsch condolau e scret ver-
balmein:

«*Jeu hai schazegiau igl Ervin,
sco carstgaun beinvulend e sco capavel scrinari*».

Meglier ed aschi alla cuorta havess'ins buca saviu caracterisar gl'Ervin.
A quei vischin in cordial Dieus paghi!